

Dr. Yüksel Altiner, profesor



S tugom obavještavamo kolegice i kolege da je iskreni prijatelj geodetske zajednice Bosne i Hercegovine i svih geodeta iz država Zapadnog Balkana, Dr. Sci. Yüksel Altiner preminuo, 7. januara 2021. Bio je vrijedan član Uredničkog odbora Geodetskog glasnika, a u posljednjim brojevima su objavljeni njegovi posljednji članci.

Dr. Altiner je posjećivao Bosnu i Hercegovinu u više navrata, bio je jedan od glavnih organizatora GPS kampanje EUREF Balkan 1998. Rado je dolazio u Sarajevo i na Odsjek za geodeziju Građevinskog fakulteta Univerziteta u Sarajevu, zajedno sa svojim prijateljem Prof.

Dr. Asimom Bilajbegovićem, s kojim je potpuno ravnopravno diskutirao o geodetskim problemima, uvijek u prijateljskom tonu, a pri tim bi blagi smiješak bio na licima obojice, iako nisu uvijek dijelili isto mišljenje. Dr. Altiner je uvijek s velikom radošću držao javna predavanja u organizaciji Saveza udruženja geodeta Bosne i Hercegovine, uvijek o najmodernijim metodama i napretku satelitske geodezije u Evropi i svijetu.

Yüksel Altiner je studirao geodeziju na Yildiz Tehničkom Univerzitetu u Istanbulu, gdje je stekao zvanje Bachelor geodezije. Studij je nastavio u Njemačkoj, na Univerzitetu u Bonu. Tamo je stekao zvanje Magistra i Doktora nauka iz oblasti geodezije. Bio je sjajan poznavalac teorijske geodezije i matematičkih metoda u geodeziji, ali je privatno preferirao pisanje i bavio se također novinarstvom. Malo je poznata činjenica da je od 1980. do 1988. bio dopisnik u Njemačkom Parlamentu (*Deutscher Bundestag*).

Od 1989. godine radio je u prestižnoj njemačkoj, svjetski poznatoj agenciji “Federal Agency for Cartography and Geodesy iz Frankfurta na Maini u odjelu “Geodezija”. Njegov glavni naučni interes bio je istraživanje pomjeranja Zemljine kore uz korištenje GNSS opažanja. Dr. Altiner je evropskoj i svjetskoj geodetskoj bio poznat po Teoriji analitičke deformacija površina koju je razvio i opisao u knjizi izdanu 1999. godine u izdanju Springer-a, pod naslovom: “Analytical Surface Deformation Theory”. <https://www.springer.com/de/book/9783540658207> Kasnije je njegova knjiga prevedena s engleskog na kineski jezik.

Godine 1997. je Inter-univerzitetski Komitet Turske mu je dodijelio zvanje univerzitetskog docenta i povremeno je kao gostujući profesor predavao na turskim univerzitetima.

Odsjek za geodeziju i geoinformatiku Građevinskog fakulteta Univerziteta u Sarajevu izgubio je njegovim odlaskom nesebičnog prijatelja i teško je vjerovati da više nećemo slušati predavanja iz najnovijih dostignuća iz oblasti satelitske geodezije. Bio je dobra osoba, veliki čovjek, potpuno posvećen nauci i istraživanju, te se iskreno nadamo da će svoja dobra djela uskoro vidjeti na boljem mjestu u Univerzumu. Ustvari, ja vjerujem u to kao što vjerujem da su istinite riječi:

...“Onaj ko bude uradio koliko trun dobra, vidjet će ga, a onaj ko bude uradio koliko trun zla, vidjet će ga”...

Medžida Mulić